



11. februar 2014

FM14/56

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

**Nunatsinni nukissiuuteqarnikkut niuerneramik ingerlatsiviup, ikummatissanik pilersuivittut ingerlasup pisortanit pigineqartup Polaroil-ip KNI A/S-imit avissaartinneqarluni 1. Januar 2015-mit aallartittumik ingerlatseqatigiiffittut ingerlanneqalernissaa siunertaralugu Naalakkersuisut piareersaataasumik sulissuteqaqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortat Knud Kristiansen aamma Gerhardt Petersen, Atassut)

### **Tunngavilersuut:**

ATASSUT-mit kissaatigaarput Kalaallit Nunatsinni pisortat ingerlatsiviisa ingerlanneqarnerat ammasumik periuseqarluni ingerlanneqassasut, taamatuttaa partiitut pingaartitatta ilagaat Kalaallit Nunatsinni niuerneramik inuussutissarsiornermillu ingerlatsinermi pisortat naqisimannittutut inissisimatinneqassanngitsut, taamaammallu pisortat ingerlatseqatigiiffiutai namminersortunngorsarneqarsinnaasut aqqutissiuunneqassasut.

Matumanili siunnersuummi namminersortunngorsaanissaq salliutinngilarput, ingerlatseqatigiiffiulli pisortat pigisaata KNI-p paasiuminarnerusumik ersarinnerusumillu ingerlanneqarnissaa siunertaralugu Polaroilip avissaartinneqarluni nammineq ingerlatseqatigiiffittut ingerlanneqalernissaa pingaarnertut aqqutissiuukkusupparput.

ATASSUT-mit naliliinerput naapertorlugu nunaqarfinni illoqarfinnilu isorliunerusuni nioqqutissanik pilersuinermi paasiuminartumik ersarissumillu ingerlatsinissaagaluq suliassaqarfiit assigiinngitsut ataatsimut eqiterullugit ingerlatsisoqarneratigut pinngitsoortinneqartarpoq, allaallu aarleqqutigineqarsinnaavoq nunatta karsianit aallaavilimmik aningaasat amerlanerungaartut inuiaqatigiinni kaaviiartinneqarsinnaanerigaluat pinngitsoortinneqartarpoq.



KNI A/S-ip 2012/13-mi naatsorsuutai qimerlooraanni takuneqarsinnaavoq Polaroil 73,1 mio. kr.-inik sinneqartoorsimasoq taamaattorli KNI A/S-ip ataatsimoortumik naatsorsuutaani takuneqarsinnaavoq akileraarutit sulii ilanngaatinagit ingerlatseqatigiiffik taamaallaat 39,6 mio. kr.-inik sinneqartoorsimasoq, tassa Polaroil-ip ingerlatseqatigiiffiup sinneranut matussusiisarnerrata annertunerujussua tassaniinnaq takuneqarsinnaavoq.

ATASSUT-mit isumaqarpugut qularnaatsumik Polaroil-ip sinneqartoortumik ingerlanneqarsinnaanera KNI A/S-p sinnerata niuernermik tunngaveqarluni ineriartortinneqarnissaanut kigaallassaataasoq, takuneqarsinnaavormi KNI A/S-ip sinneranut Polaroil qanoq isumalluutaatiginersoq, tamannalu peqqinnangilaq aammalu inuiaqatigiit ataatsimoortumik aningaasaqarneranni Polaroil-ip kaaviiartitseqataasinnaanerigalua KNI A/S-ip aningaasartuutaanut allanut matussutissussamaatitut inissisimanera pissusissamisunnigisoq.

ATASSUT-mit erseqqissaatigissavarput siunnersuutitsinni piffissaliinerput allangortinneqarsinnaanera sillimaffigatsigu, pingaarnepaavormi Polaroil-ip ingerlatseqatigiiffittut nammineq ingerlasutut piareersarluarneqarsimalluni aallartinneqarsinnaanissaa aamma KNI A/S-ip torersumik patajaatsumillu ingerlaqqissinnaanissaa qulakkeerneqareerpat avissaartitsineq ingerlanneqarpat.

**Pisortanut aningaasatigut allaffissornikkullu kingunerisassat:**

Soqanngilaq, naatsorsuutigineqarpoq Ingerlatseqatigiiffinnut allattoqarfimmut aningaasaliunneqartartut iluini piareersarnermi aningaasartuutigineqartussat matussuserneqarsinnaasut.

**Namminersorlutik inuussutissarsiuteqartunut aningaasatigut allaffissornikkullu kingunerisassat:**

Soqanngilaq

**Innuttaasunut aningaasatigut allaffissornikkullu kingunerisassat:**

Soqanngilaq